



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail: tiryimyim@gmail.com

TAPAK 7 Yangia anidakangma : f Tir Yimyim i tir_yimyim

tir yimyim TAPAK 8

India den arütsü ken o tajunglen nungi angatetteptsü: Nepal PM

French Open: Kostyuk-i Swiatek tsükdaktsüogo



VOL. XXIII ISSUE NO. 228 (ADOK 228) DIMAPUR TENTONÜ (MONDAY) AAMI (JUNE) 01, 2026

₹ 5.00

ENWO & DSC-i tashiyim inyakba aitsür Eastern Naga tanurtem kilir ama mayutsü nenshir

Dimapur, May 31, 2026 (TYO): Eastern Nagaland Women Organisation (ENWO) aser Dimapur Sumi Council (DSC) teloktemi sangdong balala ajanga O. Watimeren Jamir-i arishi küm 14 tain tanur tetsür ka dak tashiyim inyakba khukhua aitsüba metetdaktsüogo.

ENWO-i agütsüba sangdong nung September 7, 2023 nü Executive Meeting nung lemtetba ama tetsürtem aser tanurtem dak tashiyim mapa inyakba khenyongi magizüksü bangzüng renemba nung masetshii noktaker ta nenshiogo.

Special Investigation Team (SIT)-i indangidanga aser shinga tsütsü tejak meshii bushisügang asütsü imlar ta ENWO-isa ashi.

Iba tatalokba nung tongti tai tonglokja alisang anema Protection of Children from Sexual Offences (POCSO) Act kübok benoka lir anungji tetsübu kecha melii aser tejak mereprangi ozüng lateta aliba ama inyaktsüla ta ENWO-isa metetdaktsüogo.

Sorkar aser bangdak ketdangpur ajaki temeten agütsütsüsa mapa inyaktsüla aser tai tonglokja alisang merenshütsüla ta parnokisa shiogo.

ENWO-isa Eastern Naga tsüraburtem dang kechi koda asüyonga pei chinurtem kidang yariteper ama meyoktsü nenshia metetdaktsüogo.

Tanurtem shisaliok bushitsü atema dang kidang nungi pilar alitsüla aser ENWO guidelines sülen anidaktsüla. Ki kiburtem aser guardian temi Eastern Naga tanurtem kidang mapa inyaktsü atema mayutsüla ta ENWO-isa metetdaktsüogo.

Tanurtem kaket shisatsü angutsü atema tangaleni yoker saka tatem nungbo kilir ang inyakdakja shisaliok angutsü temeten magütsüba ya tebilemtsü tulu ka lir. Anungji ENWO-i tanurtem kümzüka ayutsü asoshi guidelines aser resolutions renema aliba sülen tsüraburtem, guardians aser

employers-i anidaktsü ayongzüker ta Eastern Nagaland Women Organisation (ENWO)-isa metetdaktsüogo.

Tanur kaketsür ka la indang guardian-i mapang talangka shi aser tekolok nung timtemdakja aruba osang angashia temulung raksar aser iba inyakyim khukhua aitsür ta Dimapur Sumi Council-i sangdong ka nung ashi.

Guardian ka ya tekümszüker ka aser shisalen agütsür ka asütsüla saka iba nisungi pa tashi amshia tekümszüker shinga maliba tanur ka dak iba tesempatsü mapa inyakba ya human rights alema inyakba ka aser lanur kaketsür ka taküm raksatsüba ozüng alema inyakba mapa ka lir ta DSC-i ashi.

Onoki tanutsüla den külemi noktaker aser lai ajangshiba timtem aser reshikangshiji angajemer. Lokti ka ama onoki la nem dang iba khuret mebandaktsütsü aser la nem medical, psychological, aser educational support agütsütsü akhanger ta DSC-isa ashi.

Parnokisa jungjunga bushisügang asütsü aser aibelener nem tapet temerenshi agütsütsü takhangba agütsüogo.

Meghalaya Chief Minister Conrad K Sangma-ia Nagaland nung arishi küm 14 tain Chang nunger tanur tetsür ka dak tashiyim inyakba aitsüba metetdaktsüogo.

"Tanur shingaia ibala timtem aser tekangshi majangshitsüla aser tanurtem dak tashiyim inyakba ya magizüker aser ozüng tapet agi merenshütsüla. Bangdakpurtemi mapang shiak nung bushisügang asütsüla aser Protection of Children from Sexual Offences (POCSO) Act dena ozüng tapet kübok temeten agütsütsüla" ta CM Conrad-i X nung osang lemsatet.

"Ni tanutsüla aser lar kibong asoshi bilemtsür. Loktiliba tanurtem dak tashiyim inyakba anema külemi longjemer noktaksüla aser tanur shia lendong nungi jenbua lidaktsütsü asoshi inyaktsüla" ta Conrad-isa ashi.

Nagaland gun license atema Mumbai nung nisung ka apu

Guwahati, May 31, 2026 (Agencies): Mumbai nungi arishi küm 36 tain tebur kati taila firearm licence renew asütsü atema Police Clearance Certificate (PCC) taila ka agütsüba atema pua lir.

Iba firearm licence ya Nagaland sorkari agütsüba lir ta Honibarnü police-i ashi.

Iba nisung ya Faiz Irfan Adenwala ta jangaogo aser pai pa indang arms licence renewal maparen nung taila kulikaket agütsü. Pai Mumbai Police

Commissionerate danga firearm aliba osang metetdaktsüi liasü ta police-isa ashi.

Iba taila kulikaket amshiba putetba sülen Mumbai kübok Khar Police-i Arms Act den külemi Bharatiya Nyaya Sanhita (BNS) kübok FIR ka benokogo.

Police-i taila PCC anguba tsüngsü bushitepdar aser parnoki arms licence renewals atema taila kulikakettem agütsüba organised network ka alitsü akok ta temulung meleme bilemba metetdaktsüogo.

Centre-i Manipur nung COBRA commandos mapa lemzüksür



Imphal, May 31, 2026 (Agencies): Manipur nung security akangshitsü aser yimjung bener arutsü atema Union Ministry of Home Affairs (MHA)-i Central Reserve Police Force (CRPF) nungi elite Commando Battalion for Resolute Action (COBRA) battalion ana mapa lemzüksütsü mulunga agizükogo.

West Bengal nung amenoka aliba 207 COBRA aser Assam nung amenoka aliba 210 COBRA battalion ana Manipur nung mapa lemzüksütsü ta osang angazüker.

Item commando temi Manipur nung ozüng alema inyakba aser mepetmesü adokdaktsüba telungpur teloktem anema inyaktsü.

Manipur nung May 2023 nungi Meitei aser Kuki-Zo nunger tsüngsa mepetmesü

adoka rarayonga arur aser iba nung nisung 260 tema asüba den meyirjang aika pei talidak toktsür ogo.

Manipur nung yimjung aser security meinprongsü atema inyakba telungpur teloktem anema specialised COBRA units-i mapa inyaktsü ta security ketdangsür kati ashi.

COBRA ya CRPF nung elite jungle warfare force ka lir aser 2008-09 meta Left Wing Extremism (LWE) aser insurgency anema raratsü atema tentetba liasü.

Tang tashi nung COBRA battalions 10 lir aser battalion shia nung intelligence-based operations, guerrilla warfare, jungle combat, aser anti-insurgency tactics atema training jungjunga agiba commandos 1,000 shi lir.

Mukesh Singh-i tanü nungi DGP invaker

Mukesh Singh-i June 1, 2026 nungi Manipur nung Director General of Police (DGP) inyaktsü.

Mukesh Singh yashi Honibarnü New Delhi nungi Imphal tonga aru aser Imphal International Airport nung Manipur Police ketdangsürtemi pa pelaa agizük.

Mukesh Singh-i DGP Rajiv Singh melenzüksü. June 2023 nungi 1993 batch Indian Police Service (IPS) ketdangsür Rajiv-i DGP inyaka arur.

Mukesh Singh shimba ajanga Manipur Police indang operations nung tapak tasen ka tenzüksü imlar. Pai DGP inyakdang yimjung yangluba, law enforcement aser public safety maparen akangakanga inyaktsü imlar.

Kohima nung World No Tobacco Day 2026 mungogo



Dimapur, May 31, 2026 (TYO): Department of Health and Family Welfare-i Deobarnü Capital Convention Centre, Kohima nung World No Tobacco Day 2026 sentong ayonga agiogo aser iba ya youth ministry lenirtem nem iba khuret tali tajungba angatetdaktsütsü asoshi amung.

Iba sentong ya National Tobacco Control Programme (NTCP) Nagaland kübok State Tobacco Control Cell ajanga ketdangsüa ayongzüker.

"Unmasking the appeal - countering nicotine and tobacco addiction" omen kübok lanurtemi moko aser nicotine achiba tebilemtsü koktetsü aser moko azüokba nung nübürtem shilem agiba tali tashi itshitsü nükjidong nung iba sentong ya ayongzüka liasü.

Sentong akhumdong ama Health & Family Welfare Secretary S Tainiu-i jembidang,

Nagaland nung awareness campaigns dak alia moko azüokba maparen inyaker ta ashi.

Municipal bodies den teka amteper sorkari tobacco vendor licensing rules yanglutsü meranger, ta lai metetdaktsü.

Moko yangluba industry teka sangshiba nungi nübür kumzüka ayutsü atema WHO FCTC Article 5.3 nung State Empowered Committee ka tentetogo ta Tainiu-isa metetdaktsü.

Enforcement teams-i tesem balala mita aoba maparen ulushia inyaker aser iba jagi tesüba financial year mapang kaketsü temeket 100-yard tobacco-free zone nung aibelenba asoshi temerenshi 400 dak tema agütsüogo ta laisa ashi.

Dr. I Simon Sumi, State Nodal Officer, NTCP ajanga omen nung ajemdaker jembidang, nicotine aser moko oset ajanga lanurtem

atsür aruba aser moko oset tem tali anguba indang lemsatepa liasü.

Principal Director, Health & Family Welfare, Dr. Mereninla Senlem-i state nung moko amshir lanur tali akümba tebilemtsü lemsatepa liasü.

Laisa mokozü maliba moko ajanga oral cancer tali kumdaktsüba indang lemsatet aser arogo lenirtem aser youth ministry tem dang pei aliba tesem nung moko nungi jenbua aliba inyakyim nung yaritsü ajungshia liasü.

Mission Director, National Health Mission, Dr. Keveduyi Theyo-ia lanurtem temang anema alitsü asoshi tamangba yimsü nung amendaka aliba lanur tentet aser lokti balalai shilem agitsü tongtipang ta ashi.

Iba sentong nung Tokivi P Swu-i takum kuli agütsü aser anti-tobacco pledge agia liasü.

Jalukie nung World No Tobacco Day amung



College of Veterinary Science and Animal Husbandry, Jalukie nung May 30, 2026 nü Peren District Legal Service Authority (PDLA) ajanga National Tobacco Control Programme (NTCP), Peren den lungjemer World No Tobacco Day amungdang tangokba noksa ka yangi angur.

Dimapur, Monupii/May 31 (TYO): Peren District Legal Service Authority (PDLA) ajanga National Tobacco Control Programme (NTCP), Peren den lungjemer May 30, 2026 nü "Unmasking the appeal-Countering Nicotine and Tobacco Addiction" omen kübok College of Veterinary Science and Animal Husbandry, Jalukie nung World No Tobacco Day munga liasü.

Phenruangwibo Newmai, Panel Lawyer, PDLA ajanga Legal Service Authority Act indang tongmelang agi rateta ashi. Advocate Italang Ramlia, Retainer Lawyer, PDLA ajanga COTPA Act 2003 Sec 4 and Sec 6, tanur dang moko ayokba nokdangba aser kaket reju temeket meter 10 telungzük nung moko ayoktsü memelaba aser nüburtemi amshiba tesemtem nung moko achitsü memelaba indang lemsatepa liasü. Hoineichin, Programme Cordinator, NTCP, Peren

ajanga iba anogomung omen 'Unmasking the appeal-Countering Nicotine and Tobacco Addictio' indang jembia liasü. Sentong nung Dr. W. Ramdas Singh, Asstt. Prof, Pharmacology & Toxicology ajanga pela agizükba o jembia liasü. Iba mesük sentong ya May 31, 2026 nü Jalukie Town Local Baptist Church nunga ayongzükba Sunday School team nungi nisung noklang dak tema shilem agi, kong NTCP team-iba anogomung nükjidong lemsatepa liasü.



28 Koridang Assembly Constituency Bye-Election indang Expenditure Observer D.Sreedhar Reddy, IRS-i May 30, 2026 nü Deputy Commissioner, Mokochung indang Conference Hall nung candidates indang Expenditure register repranga senden tatebangba amendang tangokba noksa nung angur.

Dimapur, Monupii/May 31 (TYO): Arishi küm 14 tanur tetsür ka dak tim masüba mapa inyakba khukhua aitsür, koba ajanga nüburtem kanga aoksatsüogo, ta Bharatiya Janata Party Nagaland ajanga sangdong ka nung ashi. Tang iba ama mapang onoki tanutsüla aser lar kibong den tejashi lemsateper. Tanur anema mapa tamajung inyakba ya nisung meimchir akhum metsübo inyakba mapa tamajungtiba rongnung ka lir aser ozüing kübok tesashitiba telangzüba agütsüsüla, ta ashi. Tai tonglokja alisang puogo aser tamale anticipatory bail agüja aliba agientsüba asoshi ketdangsür dang pelar aser kanga jungja, indang-indanga ase memonui bushisüingdanga ozüing agi melaba ama obendang agütsüsü ajungshir, ta BJP Nagaland ajanga ashi. Iba amala tatalokba ajanga tetsür aser tanurtem asoshi maneni tebilemstsü akaba mapang ka nung nüburtem lungjemer nokdaksü tongtipang lir. Onüki lokti balala lenirtem, civil society organizations, aser nüburtem dng tanurtem kumzükba ayutsü nükjidong nung inyakba maparen yaritsü ayongzükba, ta ashi. Tetsür aser tanur kumzükba

ayutsü asoshi temulungtetba nung nokdaka lir aser kechi komala jenjang ka nung lidir liaka, nisung shinga ozüing dang temaba masütsüla. Mapang tetemsü nung ozüing agi takok ngua obendang agütsüsü imlar, ta BJP Nagaland sangdong ajangasa ashi. National People's Youth Front (NPYF), Nagaland State ajanga sangdong ka nung, O. Watimeren Jamir-i Chang kin nungi tetsür chanu ka dak tim masüba mapa inyakba asoshi khukhua aitsür, ta ashi. Tanur ka dak iba ama tesembatsü mapa tamajung inyakba ya ozüing nung aibelenba kisüing masü saka tanur ajunga temeden, akhukmet anema inyaksangshiba lir. Iba tatalokba ya tebilemstsü tulu ama onoki ajiteter aser tanurtem anema mapa tamajung inyakba kecha tensa nunga tatok magütsüsüla, ta NPYF ajanga ashi. Tanurtem kumzükba ayutsü ya arok teinyaktsü asütsüla, aser tanur dak tim masüba mapa inyakba mesüra mashi lenmang nung anisaba asoshi tetsübo makai ozüing agi melaba ama temerenshi agütsüsüla, ta ashi. Ozüing amshirtem,

obendangba bangdak nung alirtem aser tim ketdangsür ajunga dang tekeraba nung indang indanga aser ochishia bushisüingdanga Protection of Children from Sexual Offences (POCSO) Act aser Indian Penal Code nung tapet sections amshia obendang agütsüsü ayongzükba. Iba ama ken o nung obendang menuba ajanga timtem ajurur alir aser kinungertem tali ang kangshidaksür, ta NPYF Nagaland ajanga ashi. Iba ama mapang tamajung nung timtem ajurur alila aser lar kibong den onok dena lir. Parnok dak tasü aitba onoki sakloker aser ochi obendang bushiba nung parnok kisüing masü ta angatetdaksüner. La kumzükba ayutsü asoshi nungdakba mera ajak agütsüla, ta ashi. Kasa mapang CSOs, lenirtem, lanur tentet aser Nagaland tesem balala nung aliba senso ajunga dang lungjemer iba ama mapa tamajung aitsüsü ajungshir. Tarutsü putu asoshi ochi obendang shidak agüja, ochishia inyaksü aser tetsübo maliba lima kumdaksütsü nükjidong nung inyakba ajak nung onoki maneni bhukuma nokdaksü, ta NPYF Nagaland

Nagaland tesem balala nung World No Tobacco Day amung

Dimapur, Monupii/May 31 (TYO): Deobarnü Nagaland nung district aika nung World No Tobacco Day 2026 munga iba anogomung nungtem nung sorkar agencies aser lokti tentet balalai sentong tem ayongzükba liasü. **ZUNHEBOTO:** World No Tobacco Day nungtem nung awareness sentong ka Old Town Prayer Fellowship, Zunheboto nung ayongzükba Easter H Yephthomi, retainer lawyer, Zunheboto District Legal Services Authority (ZDLSA) ajanga Cigarettes and Other Tobacco Products Act (COTPA), 2003 indang jembia liasü. Nüburtem aliba tesem nung moko achitsü memelar aser aibelener dang senchi sen 200 achitsü iba Act nung shia lir, ta Yephthomi-i ashi. Iba sentong nung NTCP psychologist Alibo K Swu aser tangar temia shilem agia liasü. **WOKHA:** Tiyichan Lotha Baptist Church, Wokha nung World No Tobacco Day amungdang Junior Specialist, District Hospital Wokha, Dr. Bipenthung N Jami-i, moko agi yangluba oset tem ya lanurtem atsür arutsüsa nungtugu nisungtem amshidaksür, ta ashi. Iba sentong nung Bethsaida School Wokha ya 'Tobacco-Free Educational Institution' ta sangdonga liasü. Sentong nung Christian Education Ministry ajanga video presentation ka agi shilem agi aser Erenbeni PLotha, Wokha District Legal Services Authority (WDLA) ajanga COPTA 2003 indang rateta ashi. **TUENSANG:** NTCP Tuensang ajanga Old Church, Tuensang Village nung World No Tobacco

Day munga liasü, kong tongti tesemdanger Sr. SDEO Tuensang, Tiarenla Sangtam aser sentong akhumdong Rev. T. Mongba liasü. Senior Dental Surgeon and District Nodal Officer (NTCP), District Hospital Tuensang, Dr. O Daisy Oving-i iba anogomung omen nung ajemdaker jembia liasü. Lai iba mapang moko yangluba company temi lanurtem atsür arutsü tasa amshiba aser moko amshiba ajanga temang nung timtem agütsüba indang lemsatepa liasü. Nagaland nung arishi küm 15 aser tema shilem 43.3-i moko amshir, koba national average dang timba lir, ta Dr. Oving-i metetdaksü. Iba sentong nung Keshai Village ya tobacco-free village ta sangdong aser Tuensang district kübok school ter tobacco-free schools sangdonga liasü. **MON:** Mon nung World No Tobacco Day nungtem nung moko aser nicotine amshiba ajanga timtem agütsüba indang awareness agütsüsü asoshi sentong ka New Site Fellowship Church, Mon nung ayongzükba liasü. Onen nung ajemdaker Dr. S. Ngampa Sangme, MD (PMR), District Hospital Mon ajanga jembidang, tobacco aser nicotine agi yangluba oset nung lanurtem mashi lenmang nung anisatsüsa amshia aliba temai adoktsüsü nungdakba indang ashi. Iba sentong nung quiz competition, anti-tobacco pledge aser kulzüing kaket tem agütsüba mapang liasü. Iba sentong nung Longwa village nungi school pezü tobacco-free schools ta sangdonga liasü.

Tanur ka dak tim masüba mapa inyakba lokti balalai aitsür

sangdong ajangasa ashi. Dimapur nung tetsür ka dak tim masüba mapa inyakba asoshi onoki khukhua aitsür. Taoba mapanga onoki sangdonga lir aser ano maneni sangdonger, iba tesempatsü mapa ya asen lima nung khenyongi tasen lir aser civilized society nung khenyongi mapet. Tanagalen nungi bener arua amshiba iba yimya ya poktetba leni meyipa yoktsüla aser asen li nung jurisdiction mesüra taitok mali, ta Angami Students' Union sangdong ka ajanga ashi. Tanü-asüing tensa ka nung terenlok alitsü melena asenoki mulungsentsü meshidak aliba ang tali anguba ya tebilemstsü tulu lir. Nüburtem aser kaketshir mulungjang nung tetsübo tali ang kumogo, kechiaser item ama mapa tamajung yagi asen tesunep amokmerener, ta ASU-i ashi. Nisung ka indang akhum bener aotsü shinga daka temeden mali. Onok kodanga ola madoki repranga alir ka masütsü. Nisung meimchir akhumket nung aibelentsü tebilemba aliba nungi kumzükba ayutsü asoshi onoki menungnangi yaritsü, ta ashi. Tetsürla aser tejashi nung aliba kinungertem den onok

dena lir, aser ozüing amshir aser obendanger tem dang aibelener nem temerenshi tapet agütsüsü ayongzükba. Ochishia tangatetba teindang nung aser shinga nema mekongshidaksüi mesüra atsüanem makai ochi obendang agütsüsü onok teimla lir, ta ASU sangdong ajangasa ashi. O. Watimeren Jamir aser par medemer temi tetsür chanu ka dak tim masüba mapa inyakba indang tawa temai adokba nung onok kanga tebilemstsü akar aser aitsür, ta All Nagaland College Students' Union (ANCSU) sangdong ka ajanga ashi. Tetsür aser tanur anema tim masüba mapa inyakba kecha magizüktsü tangatetba nung ANCSU indang-indanga nokdaka lir. Ozüing amshirtem aser ketdangsürtem dang O. Watimeren Jamir aser par medemer anema indang-indanga, ochishia mapang shidak nung bushisüingdanga ozüing agi melaba ama obendang agütsüsü onoki ayongzükba. Tetsürla aser lar kinungertem den onok nokdaka lir aser ozüing inyakyim shidak amshia nungdakba teyari ajak agütsüsü ajungshir, ta ANCSU sangdong ajanga ashi.



Bhubaneswar, May 31, 2026: Odisha nung Special Intensive Revision (SIR) atema Biju Janata Dal Tir, Naveen Patnaik-i enumeration form nung sign asudang tangokba noksa nung angur.

Chhattisgarh nung süngdong lakh 7 lendoktsü: Jairam Ramesh

New Delhi, May 31 (Agencies): Chhattisgarh nung Hasdeo-Arand arem nung koila ayatsü atema project ka agizükogo aser iba project kübok süngdong aika lendoktsü atema Modi sorkari temelaba agütsüba atema Amongnü Congress-i Centre sorkar sashia aitsüogo.

Chhattisgarh kübok Hasdeo-Arand arem nung koila ayatsü atema süngdong lakh aika lendoktsüba akümtsü aser iba atemaji Environment Ministry forest advisory committee (FAC)-i temelaba agütsüogo.

Surguja district kübok Kente Extension Opencast Coal Block nung koila ayatsü aser iba ya Adani group-i achaayanga inyaker.

Congress general secretary in-charge communications, Jairam Ramesh-i, Modi sorkari Chhattisgarh kübok Kente Extension Opencast Coal Block nung koila ayatsü atema temelaba agütsüogo aser shilem 98 bo Hasdeo Aranya pristine

sal arem nung lir, ta metetdaksü. Ramesh-i X ajanga, iba atemaji süngdong lakh 7 lendoktsüba akümtsü, ta metetdaksü.

Ibaji ajanga merok-kiyi aser shiti densema arem shiruru aika samatsüba akümtsü, ta pai ashi. Ramesh-isa, ibaji ajanga meimchir aser arem shiruru tsüngda timtem adoktsü, kechiyong coal block ji Lemru elephant corridor nungi kilometer 3.6 dang pilar lir, ta ashi.

Ramesh-i, ibaji ajanga Hasdeo ayong nung tzü ayimba aser Bango dam-a kongshitsü, ta ashi.

2022 küm January 26 nü Chhattisgarh Legislative Assembly nung Bhupesh Baghel-i aniba Congress sorkari Hasdeo Aranya nung koila ayatsü memelatsü atema bangzüng ka renemer agizüka liasü, ta Ramesh-i metetdaksü.

"Modani timtem aketba gol sorkar yimsüsüba aruba sülen parnoki iba project agizüksü nükjidong nung inyak," ta pai

metetdaksü. Arem samaba atema senotsü temenok agütsüba jagi kecha masütsü, ta pai ashi.

Iba Coal block ya 2015 küm linük meyong Rajasthan Rajya Vidyut Utpadan Nigam Limited (RVUNL) nem agüja liasü.

Mongintemia, iba project ya mapa küma benokra ibaji ajanga tzü-mopung, sobaliba aser loktiliba lenla ajak kongshitsü, ta shiogo.

Iba coal block ya Lemru elephant corridor nungi kilometer 3.6 dang pilar lir aser iba corridor ajanga shiti kanga senzüker, ta May 8 nü FAC senden nung metetdakja liasü.

FAC-ia iba project ajanga region nung shiti senzüsebong kongshitsü ta bangjemogo.

Indian Council of Forestry Research and Education (ICFRE) aser Wildlife Institute of India (WII)-ia iba region nung biodiversity indang study ka ajanga, iba project ajanga ali anenzüka bener oadoktsü ta bushiteta liasü.

Delhi nung commercial building ka chirepba lendong nung nisung 6 asü

New Delhi, May 31 (Agencies): Delhi nung Saket Metro station anasa commercial building ka chirepba lendong nung nisung trok asü aser aika kümzüka hospital-i anir ao, ta ketdangsertemi metetdaksü.

Police-i ashiba agi, iba lendong nung asürtem aser yirurtem karbo Foreign Medical Graduate (FMG) Examination agütsüsurtem liasü.

Saket nung building chirepba tesem ya bendang linük balala nung Medical aser Engineering studies atema coaching agirtem aika aliba tesem ka lir.

Iba dak sendakba nung FIR ka benokogo aser bushisüngdong tenzükogo. Iba building nungji coaching institute ka, cafes aser office aika lir.

District Disaster Management Authority (DDMA)-i, "Honibar aonung 7:40 ako meta building ka chirepba osang Emergency Operation Centre nem metetdakja liasü. Iba sülen rescue tem den Quick Response Vehicle ka iba tesem jagi yoka liasü," ta metetdaksü.

"Iba tatalokba nung nisung trok süogo aser kümzüka

maparen tang teinyakdak," ta Deputy Commissioner of Police (South) Anant Mittal-i metetdaksü.

Iba lendong nung yirurtemji arrshi küm 22-27 tsüngdapurtem lir aser parnok ajak AIIMS Trauma Centre-i anir oa treatment agidar.

"National Disaster Response Force (NDRF), Delhi Fire Services (DFS), DDMA, Delhi Police, Delhi Civil Defence, CATS ambulances aser temelungertemi aonung piyong kümzüka maparen inyaka liasü. Rescue teams-i Hydras, JCBs, rotavators, hydraulic cutters, camera aser azü amshia jana agi nembanga alirtem bushia kümzüka," ta DDMA-i metetdaksü.

Kümzüka maparen inyakertemi parnok 14 jana nungi agitet aser iba nungjagi parnok 6 bo mekümzükteti asü, ta DDMA-isa metetdaksü.

Pei nem lemzüksüba mapa nung tamakok anguba atema MCD South Zone DC, Assistant Engineer (Building) Sudesh Singh Chouhan aser Junior Engineer (Building) Aman Jain nungner mapa nungi anenja lir.

Admiral K. Swaminathan-i Navy Chief mapa agizükogo



New Delhi, May 31, 2026: Admiral Krishna Swaminathan den pa kinüngtsü aser jala ana noksa nung angur.

New Delhi, May 31 (Agencies): Amongnü Admiral Krishna Swaminathan-i Indian Navy nung tongti menden agizükogo; pai Admiral Dinesh Tripathi melenzüker.

Chief of Naval Staff (CNS) makümdang Admiral Swaminathan ya Western Naval Command nung Flag Officer Commanding-in-Chief inyaka liasü.

Admiral Swaminathan-i 27buba Chief of the Naval Staff mapa agizükodang sepaitemi pa nem akhüm agütsü. Iba sentong nungji pa kinüngtsü den jala ana liasü.

Chief of the Naval Staff mapa agizükba sülen Admiral Swaminathan-i, "Indian Navy nung tetsür-teburtem den külemi inyaksü atema iba maongka anguba atema ni kanga pelar. Alima nung mongintem rongnung asen Navy densema lir," ta ashi.

Osangbenertem den jembidang Admiral Swaminathan-i, tang region nung security tensa ya tayongzükba tulu, angatetsü kanga tasak aser kechi ataloktsüar meteta mali, anungji mapang ajak nung renema

alitsüji kanga tongtibang asütsü, ta ashi.

Admiral Swaminathan ya 1987 küm July 1 anogo nung Indian Navy nung commission süa liasü. Pa ya rara mapang tongtepratep tsütsü mongin ka lir. Pa National Defence Academy (Khadakvasla), College of Naval Warfare (Maharashtra's Karanja), Joint Services Command & Staff College (UK, Shrivenham) aser United States Naval War College (Rhode Island) nung zünga liasü.

Tamalen pa nem Param Vishisht Seva Medal, Ati Vishisht Seva Medal aser Vishisht Seva Medal agütsüogo.

Rear Admiral ka ama pa Kochi nung aliba Headquarters, Southern Naval Command nung Chief Staff Officer (Training) liasü.

Indian Naval Safety Team tentetba nungi pai tongti shilem agia liasü.

Tayimtsü abenba rong 'INS Vikramaditya', guided missile destroyer INS Mysore, missile corvette INS Kulish aser missile vessels INS Vidyut aser INS Vinash nunga pa commander inyakogo.

2022-23 küm India nungertemi mozü nung sen 1.6 lakh cr. Indok: NHA

New Delhi, Monupii/May 31 (Agencies): 2022-23 küm India nungertemi mozü nung sen 1.6 lakh crore indokogo; linük nung healthcare atema sen teimtiba indokba nung mozü densema lir, ta Union Health Ministry-i sangdongba National Health Accounts (NHA) 2022-23 report ajanga metetdaksü.

"Doctor temi zülutsüba mozü kija nung sen 1.3 lakh crore indok aser peisasa mozü aliba nung sen crore 26,670

indok aser anaji senteperbo mozü aliba nung sen 1.6 lakh crore indokogo. Ibaji healthcare nung senotsü shilem 20 indokba lir," ta report nung shia lir.

Kasa report ajanga, "Hospital nung admissions aser inpatient treatment nung sen 2.9 lakh crore (shilem 37.6) indok, mozü nung sen 1.6 lakh crore (shilem 21) aser outpatient treatment nung sen 1.4 lakh crore (shilem 18.7)

indok. Item telemsa asemji senteper senotsü indokbaji shilem 77.3 lir," ta metetdaksü.

Health tsütsü mongintemi ashiba agi, kidang-kibong nung senotsü shilem aika indokba nung mozü densema lir, talisa diabetes, blood pressure, temelungjang tashidak aser cancer tashidak agi shirangertemi mapang talanglang treatment agir aser mapang shia mozü aliba nung sen indoker, ta metetdaksü.



Kolkata, May 31, 2026: World No Tobacco day anogomong nung Kolkata nung telok kati moko machitsü awareness agüja shilem agidang tangokba noksa nung angur.



TIR YIMYIM YIMOBILEM (EDITRIAL)

DIMAPUR MONDAY, JUNE (AAMI) 01, 2026

Moko agi yirutsür

Moko achiba ya majung ta moko achirtemiang temeteba, anungji yashi ama alima ajunga nung Mokok Machitsü ayongzükba anogo nung moko achirtem dang moko achiba agi parnok temang yirutsüba indang ashitsü menügdaker, saka parnoki moko achiba ajanga tangar yirutsüba indangbo memeteti alitsüa akok, anungji asenok moko achirtem o machirtem rongnung moko achiba ajanga tachirtem temang raksaba dang masü saka tangar dena raksatsüba indang ya kanga süoki ia jembitsü nügdaker. Atangji, tajung kaji tanü asüngbo mokozü adoka achiba moko, cigarettes aser biri achirtembo kanga ajema kümogo, iba jagi lokti adenshidak aser shishilembaba tesem nung, akhidang ama, mokozü alonga moko achirtembo kangabo mangutsü. Ajisüaka, iba jagi moko achirtem ajema aküm ta masü saka tanü asüngbo sali nung dang moko enoker achiba dang masü saka "Rajnegandha Pan Masala" tapu aika teronem menema achitsüsa yangluteta lir. Anungji, akhi ama mokozü adoka achiba cigarettes aser biri achirtem dang nungibo mokozü madoki moko achirtemang teimba kümogo. Aji oda, mokozü madoki asenoki sali nung enoker achiba 'zarda' moko aser Rajnegandha aser Sata ama jagiang ano mokozü adoka achiba moko dang nungibo tamajungba aser tesashiba asenok temang yirutsür. Aji oda, asenok mokozü adoka achiba moko agi asen temang nung tepokbok aser temulungjang raksatsür süra mokozü madoki achiba moko agibo asen tebang telong, terok, dar aser tebinbang ajak rongsadaksür aser mapang tatsüka tsüngda cancer akümer. Iba jagi mokozü adoka achiba cigarettes pongdang nung dang masü saka Rajnegandha, Sata aser Zarda moko pongdang nunga "ya achiba ajanga temang raksar aser Cancer adoker" ta zülua angutsü. Iba amaji zülua liaka asenoki marendaker aser metsübur, anungji odang achir, ajisüaka tekümdangtsü kaji asenoki achiba moko agi asenok dang masü saka tangara dena yirutsür. Iba jagi mokozü adoka achiba moko nisungtem alidak achitsü ozüangi memelar, kechiyong aseni achiba moko mokozü tangar kati asüketba ajanga iba nisungba temangjia dena raksatsür. Ibaji dang masü saka mokozü madoki achiba mokotem agia tachirtem dang masü saka tetsürtem balaka tebok nung bena aliba tanur temang aser tokolok dena raksatsür. Ibaji kodang bilemdangdir, ano tanü asüngbo mokozü madoki achiba moko achirtem yabo tetsürtemang teimba amato angur, anungji mekümdangra aser peisasa mazüoktetra, item tetsürtem jagi asoba tanurtemi temang agi aser tokolok shisatsü agi tangar memeneptsü. Ano, shisabolutsü kaji, tanü asüng tanur aser lanurtemi akhi tsüraburtemi achiba 'tamol pan' kangabo machir saka mokozü madokba moko 'Rajnegandha aser Sata' ama kanga bolua achir, ibayongji yaktayongi tebang aser tebinbang ama nung tashidak kaa cancer kümer timtemba asenoki ajangshir. Asenoki tebang dang apia achiba aser ajemba chiyongtsütem ajak nung tachi aser tajem shia chiajemra, temang nung tajangzük agütsür saka asenoki achiba nung tajung aser tajangzük malibaji mokozü adoka achiba aser madoki achiba mokotem ya lir. Atangji, asenok kar asoshibo moko sali achiba ya sobaliba amai bentshia alitsüa akok, saka sobaliba asüyonga asenok temang raksatsüba dang masü saka tangar temang dena yirutsüba sobalibabo endoktsüla. Iba putu ya alima nung alir ajak arishia alitsü merangba putu lir, anungji aikati chiyongtsü tajung shitak bushia achir, exercise agir aser pelaa alitsü meranger, iba jagi küm agi tain kümaka, tereprangtsü nungbo tantsür tambur makümi temang nung tashi itta alir. Item takümtem jiluji ajizüka asenoka moko achiba ajanga temang raksaa arishi metemdoki, akok tashi cigarettes, biri, sata, rajnegandha aser zarda ama moko mechii tebang, temang aser taküm ajunga merüka aser anema alitsü merangdi. Tanü asen lima tajungba-tajungba küma yanglushitsüba mapa nung temang aser tokolok anema aliba sensotem nügdaker, item sensotemji asenok aser asen chirnurtem asütsüla.

OLEMSABANG

AOR KHRISTANTEM APUSUANG

~ M. Meren, Ex. Pastor.

(Yashi adok nungi...)

Asen tsürabur mapang nung asen tetsü-teboutemji kecha maka sensaker teimba oda asenoki inyaktetba kecha maka nung, alu arotsü NINOK Manipur lima nungi dang aben, noknü teimba Manipur lima nungi dang bena amshi. Aor konang sobutsü, shiret-shibu, Laküp-molung, Azük tapu ajak, Rong sentsü balala temerem aser tanak ajak par lima nungi dang bena amshi. Jang Manipur jang tajungba alia chiyung, Ngashi aser Angokong Manipur nungi dang bena achi. Naga lima School ajak shibanger tazügdak maka, anungji Imphal nung, Ukhrul nung, Tangkhul lima dang oa zünga Aor tashir aküm. Sürabang Aortem kechiba Manipur Aiatai asoshi ola madoker? Parnokjia na aser ni ama shi azü adenba purtem lir aser ajakji asen adianu masü no? Yisui ashibabo tsükchir dang pei ama meimang ta, pei kiyonger dang pei ama meimang ta, pei dangbo pi taoba ta bilemang ta shia aliba Lai tekong to asen Aor asoshi menungdakra item tekongtemji shizüka intoktsüla. Kechiba pei kiyongertem aiatai tia nung ammag sangwa maka talidak maka, tachi-tajemtsü maka pei kinungtsü aser kinungbu tepseta intoker tanur temesür mali, kar tanur ka ana aliba tepseta intoker, kar kibong ajunga leperi yoker telushidak maka alibapurtem bilemdangang. Ayawara tepoker nisungtem sümar, tenla ki maka aser sentep anir mali, School maka item amala kiyongertem asoshi Aoli Arogotemi nüktzü yima kwiben sarasadem ayongzük? Parnok asoshi Aor Khristan kwikati nüktzü kwiben yimtoker?

India P.M-i Kuki nunger asoshi ola madoker na? iba atema nungsen agüja jembia melili. Manipur Chief Minister-i Kuki samatsütsü pa nükjidong na? Aji asoshi nungsen agüja tejembi. Ano Naga nunger Chief Minister-i Meiti nunger asemer na? Aji asoshi pa nem nungsen tagütsü. Ano Naga nunger MLA kwikati Meiti nunger asemer ta ola adoker na? Ajia odang tokjang aser Naga nüchiso bushirtemi Naga nunger ta asüba ajak lungjumer süra, Manipur Naga nunger asoshia kechi ashir? Saka ajia nungsen agüja tejembi, kechiba item amala meputep adokdakja nungsen o jembir? Tang mapang pa majung pa majung ta jembia apotangshitsü mapang masü, iba jagi kecha makümtsü. Saka shiba ket nung kin aser yimli aser chuba tashi ajak ammeta lir, Pa dangji Ao Arogotemi nüktzü yima hapta ka shi danga melumitetsü no? Nenevi chubai chuba sobutsü ajak sepzüka yur süjen abener ali nung amen aser pa nüburtema yamaji pa ama amentsü, shirurutema kasa lumidaktsütsü asoshi anogo asem ayongzük, idangji Tsüngremi melanzü no?

Anungji Ao Khristantem, ordain minister-tem, Ao Pastor-tem, Ao Deacon-tem pei tetushi sobutsüji khen agizüka yuang, nenok tetushi akhümji khen ali nung yuang aser Nenevi nunger ama ali nung mener nüktzü yima aut mezüa Manipur aiatai tia nung alirtem asoshi Elia Tsüngrem dang, Temerem tzüyim kongdaktsüba Mosa Tsüngrem dang aser Yordan ayong kongdaktsüba Yihusua Tsüngrem dang hapta ka ayimtentsü memulunger no? P.M. dang tashi tuluba, C.M. dang tuluba noknü mamshii tongpang jirepdaktsüba Tsüngremji asen Tsüngrem masü no? Arung, Ao arogopurtem noknü mamshii Jeriko longtsüki jirepdaktsüba Tsüngremi Kuki nunger asemtsü asu Meitei nunger asemtsü? Asenoki o mebendangli saka Kotaker rarar nokinketer tulutiba Maikel jagi Meitei nunger asemtsü asü Kuki nunger asemtsü. Aji Kibubai o bendangtsü. Anungji asenokbo Manipur nunger rongnung yimjung adokdakjang ta dang sarasademtsü Ao arogopurtem ayongzük. Kechiaser ibai Hindu yimsü o Khristan yimsü na tongpang masü no? Amangbapurtem, tongpang ana nungji shir tsütsü adentsü? India ajunga nung Khristan State ji Nagaland dang masü no?

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir



May 29-31, 2026 anogotem nung Longkong Baptist Arogo nung 8 buba Longkong Laishir Telungjem senden "Temeshiba wazuka yutetba tamanger" omen nung takok aser temoatsü manung agiba sülen tangokba noksa nung angur. Iba senden nung Laishir 25 dena liasü.

Bangladesh nung Khristantem maneni tetsübu nung alir

May 31, 2026: Bangladesh nung taküm election agia lenir tasen shima sorkar tasen akümba sülen-a Khristantem maneni tetsübu nung dang alir; talisa Islamist Jamaat-e-Islami pusemertem aika aliba tesemtem nung Khristantem kanga timtemer.

2024 küm nüburtemi longkak aita Sheikh Hasina-i aniba sorkar atsüngdokba sülen taküm February ita nung elections agiogo.

Sheikh Hasina-i küm 15 tashi yimsüsüa aruba sülen nüburtemi lai aniba sorkar anema longkak aita la atsüngdoka liasü. La India-i jena aoba sülen nungi linük nung Khristantem aser Hindu nungertem anema inyakba kanga bulua kümogo.

February ita nung agiba election nung Bangladesh Nationalist Party (BNP)-i takok ngua liasü aser tongti

opposition ji Islamic party tem teloktep 'Jamaat-e-Islami' lir.

Open Doors UK & Ireland-i ashiba agi, taküm February ita nung election agiba sülen Khristantem aser Hindu nungertem anema inyakba kanga bulua kümogo.

Khristantemi ashiba agi, talisa Jamaat-e-Islami pusemer aika aliba tesemtem nung minorities anema inyakba kanga bulua ataloker.

March ita nunga Bangladesh yimtiba, Dhaka nung Hindu aser Khristan lenirtemi longkak aita BNP sorkar dang minorities kümzüksü atema inyang, ta takhangba agüja liasü.

Dhaka nung putir ka amakba, Islamist primary school tesayur kati Khristantem dang Islam yimsü agi meyiptsü rongshiba aser yimdak nungi meindoktsü amokmerenba

tatalokbatem densema lir.

Open Doors local partner kati, "Tesem aika nung Khristantemi timtem kanga ajangshir aser Muslim nungertemi Khristantem dang Islam yimsü dangi meyiptsü kanga rongshir," ta metetdaksü.

"Talisa Islam yimsü toktsür Khristan yimsü agizükertem tetsübu aser amokmeren nung dang alir. Muslim nung lenirtemi tanaben Islam yimsü dangi meyiptsü atema parnok rongshir," ta kasa osang ajanga metetdaksü.

"Iba ama amokmeren aser terongshiba ajanga Khristan yimsü agizükertem aser Khristan lenirtemi aika sademsadema mesenzüteter, lokti sentongtem nung madener aser karbo kibong züngsemtem kümzüksü atema atsükshishia dang alir," ta Open Doors-isa metetdaksü.

Nigeria nung Tenla kidang Khristan asem tepset aser 15 puer ao

May 31, 2026: May 30, 2026 aonung Nigeria kübok Kwara state nung Khristantem tekülem sentong tagidak mapang nung prangpong amer telok ka aruba sülen Khristan asem tepset aser 15 puer ao, ta osang ka ajanga metetdaksü.

Kwara state kübok Ekerin yimdak Khristantemji aonung 8:30 ako meta tekülem sentong tagidak mapang nung prangpong amer telok ka arua injang khaloktsü, ta police otongdar, Adetoun Ejire-Adeyemi-i metetdaksü.

Pastor Adebayo Abiodun leniba nung tekülem sentongji agia liasü. Pai iba osangji ketdangsertem nem metetdakja liasü.

Kwara State Commissioner of Police Ojo Adekimi-i puer aoba Khristantemji kümzüksü atema intelligence officers, mobile police units aser drone teams nem tetuyuba agütsüogo.

Iba tatalokba sülen Ekiti Local Government Council-i

Arogotem dang aonung tekülem sentong magii atatsü metetdaksü.

Council chairman Awelewa Olawale Gabriel-i, kanga tezülen aliba tesemtem nung tekülem agirtem kanga amaker, anungji kanga kümdanga alitsüla, ta ashi.

Paisa, Tenla kitem aser mosques nung aonung kanga menor tekülem sentong magitsü atema tamalen-a metetdakja liasü, ta metetdaksü.

Iba tatalokba aija Committee for the Defence of Human Rights (CDHR)-i, Kwara state nung item ama tatalokba ajanga yimsüngtem nung Khristantem tsübudaktsür, ta ashi.

Meimchir temeden atema inyakertemi, ozüng alema inyaker telok balalai Tenla kitem, yimsüngtem aser aluyimer Khristantem kanga amakba atema tebilemstsü katsür; joko ozüng alema inyakertemi kecha marendaki amaker, ta metetdaksü.

Parnokisa state aser linük sorkar ketdangsertem dang nüburtem kümzüka alitsü atema security agüjang, ta takhangba agütsü.

CDHR-i, yaküm November ita nunga kasa region nung Christ Apostolic Church Tenla ki amakba mapang nung aika tepset liasü aser taküm March ita nunga kasa region nung Evangelical Church Winning All (ECWA) Tenla kidang tamangertem amak, ta metetdaksü.

Nigeria nung anogoshia amai Khristantem amaker, aser iba atemaji meimchir temeden atema inyakertem aser melungtet telok aikati tebilemstsü akaba lemsateper. Ajisüaka Nigeria nung Khristantem jenti tepsetba nokdangtsü atema tashi aliba linüktemi kecha meinyaker.

Yaküm-a alima nung yimsü nung ajemdaker Khristantem teimba tepsetba linükji Nigeria liasü (Open Doors' 2026 World Watch List).

ANOGO ABEN TSÜNGREM DEN

Tindang Aser Shitak (T.Ken 119:137-144)

Kodangsa asenoki dokan nung oset alidir tajung, majung tendanger junger ta kuli zülua aliba repranger junger ta zülua aliba osettem alir. Kasaji chiyongtsü nunga tajung ta zülua aliba chiyongtsütem alir.

Tsüngremer O ji tendanger shitak ta ngutet. Ibaji kuli tejangja lir. "Ne tenangzükbatem tendangogo aser aji atangji, aji asünung ne tenzükeri aji meimer" (t.140). Ibai mi tesashi ajanga tendangba lir. Hon temeja metettsü asoshi mi tesashi nung tendanger, taribia yamaji tendanger. Asenoki Arogo otsü züngra aser Laishibaji reprangra, Tsüngrem O ji mi ajanga aoba angutsü. Abrahami ibai tendang aser shitak ta ngutet. Kongi aotsü memetet pai par ki toktsür ao saka pa Tsüngrem O kar liasü, aser Tsüngremi pa angu. Mosaia arem nung küm lir alidang Tsüngrem O tendang. Tenüngsang Ken nung Dawidi mi ajanga aoba asenoki angur. Pai kechi inyak? Pai Tsüngrem O ji tendang.

Laishibaji tendang aser tetendangba nung takok angu. Ibai ochi, tiyazü kecha maten. Anungji ibai ajaki amangtsü akok. Otsü ajunga nung shirnoki Kibuba dak amang parnoki ashitsü akok, "Nai Tsüngrem O dak metaloktsü akok."

Nai ne taküm nung Tsüngrem O ji tendanger asü? Na tang mi tesashi ajanga aotsü akok. Yamaji ka süra, nai timtem aremzüka kuli kaji Tsüngrem O ji temerük, tasüngtet aser amangtsü tetemsü ta nai kuli angutsü. Ne sasa Tsüngrem O ji tendangang aser ibaji atangchichila ta metetang.

Assam nung UCC atema Khristan/ Muslim lenirtemi tebilemstsü akar

May 31, 2026: Assam nung tebur kati tetsür aika Uniform Civil Code (UCC) kinüngtsü ayuba-a nokdang benokba atema Khristan aser Muslim lenirtemi tebilemstsü akaba lemsateper.

UCC ya ajanga tamangba yimsü temeden aser sobaliba balala kongshitsüa akok, ta parnoki metetdaksü.

India nung Uttarakhand aser Gujarat state na nung tama UCC agizükba sülen iba ozüng benokba tasembuba state ji Assam lir. May 27 nü Assam Chief Minister Himanta Biswa Sarma-i ozüng tasenba ya sangdonga liasü.

Kiyimba, balalulaba aser senmang densema yimsü balala amangertem ajak asoshi küsa ozüngtem benoktsü atema UCC ya benoker. Iba ozüng kübok Scheduled Tribes nisungtembo maiter.

Iba ozüng kübok kibong akümtsü, balalulatsü aser kibong makümertem apuani ama ki ka nung külemi alitsü atema registration agitsüa akümtsü. Iba ozüng ajanga

tebur kati tetsür aika kinüngtsü ayuba-a nokdang aser tetsürtem nem senmang temeden agütsür.

Assam nung Khristan lenirtemia, iba ozüng tasenba ajanga tang yimsü dak sendakba telatetbatem-a tashi meiti kümdaktsütsü aser yimsü dak sendakba temeden-a makai akümtsüa akok, ta metetdaksü.

Khristan lenirtemisa, iba ozüng ajanga kiyimba atema yimsü rejutem nem tashi agüja aliba ya joko ketdangsertemi azüoktsü aser yimsü dak sendakba tashi makai akümtsü, ta ashi.

Iba dak alia iba ozüng kübok Scheduled Tribes nisungtembo maitdaksüba ajanga ozüng kübok sensotem kasa mezüngshitsü, ta parnokisa metetdaksü.

Ajisüaka UCC pusemertemibo, iba ozüng ya ajanga atsü-apong ajak kasa züngshitsü, ozüng kasa asütsü aser tetsürtem temeden kümzüksü, ta metetdaksü.

AO OSHI ANGAZÜKDAK:

TANÜ ANGAZÜKTSÜBA OJANG



Yimer

(n) yim ka nung külemi alir (same villager)

* Ozü yimer Dimapur nung aika lir.

Yimeryimsanger

(n) yim ka nung alir ajak (entire villagers)

* Yimeryimsanger ajak yimten temzüng kübok alir.

OLONG PAITEP # 7521

1					2			3
							4	
5		6			7			
8								9
							10	
			11		12			
		13						
14					15			
			16					

TIPLIN

- 1. O jembitsü tashi - 8
- 5. Süngjang tapu ka - 5
- 7. Tekanük nung enokba - 5
- 8. Teka amtep - 5
- 12. Tzüik asendak - 5
- 14. Tsüngpang tema aliba - 5
- 15. Ken atenba yimya - 5
- 16. Asangur - 8

LANGTSÜNGLEN

- 1. Tepok telung nung shilem ka - 7
- 2. Tamajung aküm - 5
- 3. Chi den külemi achiba - 3
- 4. Meimchir alimai aruba - 3
- 6. Laishiba nung ayong ka - 4
- 9. Tarutsü nükla - 7
- 10. Tamendakdak/Nükjidong - 4
- 11. Tenük-telen mejungi aküm - 5
- 13. Terok nungi adokba - 3
- 14. Meimchir telemsa - 3

OLONG PAITEP # 7520 TELANGZÜBA

TIPLIN :

- 1. Taa, 3. Teküm, 6. Aibelen, 7. Aut,
- 9. Ajizük, 10. Ojala, 11. Semer,
- 13. Sen, 15. Kiochtsü, 17. Itsük,
- 18. Kar.

LANGTSÜNGLEN :

- 1. Tai, 2. Asensor, 3. Tanü, 4. Kua,
- 5. Mitsüktsü, 6. Azübenshi, 8. Lah,
- 9. Jangkok, 12. Akok, 14. Nashi,
- 16. Sür.

NAI-A YA METETTER



Alima nung paper cups teimtiba bendenba nisungji India nunger Sunil Joseph lir. Joseph-i alima tesem balala sema senzüdang paper cups 858 tashi bendenteta lir aser iba atema pa nem Guinness World Records ajanga "world's largest collection of paper cups" naroküm agütsüogo.

Arishi küm 57 tain Joseph-i pa tanur asüdang nungi osettsüset bendentsü tenzüik aser class 5 azüngdang nungi stamps, coins aser matchbook stickers bendentsü kanga jangra aküm ta ashir.

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimiyim@gmail.com nung yokang mesüra Tir Yimyim bureau tem nung agüjang.

CM Conrad-i Integrated Hospitality & Sports Complex lapoktsü



Shillong, May 31, 2026 (Agencies): Meghalaya Chief Minister Conrad K. Sangma-i May 30 nü J.N. Sports Complex, Shillong nung Integrated Hospitality & Sports Complex lapoktsüogo.

Iba facility ya Meghalaya Eco-Tourism Infrastructure Development Project kübok yanglu aser New Development Bank ajanga teyari agütsü. Meghalaya nung 39 buba National Games amungdang iba tesem ya tongti asütsü imlar.

"Iba world-class facility sorkar ketdangsubaren ajungba, sentong tajung renemba aser tanen maka inyakba kuli agütsür" ta Conrad Sangma-i metetdaksü.

"2018 nung ozü sorkar akümdang Meghalaya nung sports atema total annual expenditure ji Rs 65 crore dang liasü. Ajisüaka tanü lapokba Integrated Multipurpose Indoor Hall kija ya Rs 132.9 crore endoka yanglu" ta pai ashi.

"Iba ya Meghalaya nung sports, talent aser aspiration tarutsü atema rizüngba ka lir. Onoki iba ya asen lanurtem nem bendanga agütsür" ta Conrad-isa ashi.

State sorkari lanur saisapongertem anitettsü, sporting excellence ajungkettsü aser Meghalaya nung lanurtem nem maongka talila agütsütsü atema world-class infrastructure yanglutsü temulungtetba lir ta paisa shisem.

Mizoram sorkari 'MizoTaxi' ta ser app ka sayaogo

Aizawl, May 31, 2026 (Agencies): Mizoram nung public transport operators-i sen tali meshiba azüoktsü aser tashishitsü melii taa agütsü atema state sorkari 'MizoTaxi' ta ser mobile application ka sayaogo.

Iba ajanga passenger temi government-approved fares jangjatsü aser iba amaji

agütsütsü. Iba app ya Aizawl yimti nung mezüng amshi tenzüksü aser July 1, 2026 nungi mapa akümtsü ta sorkar sangdong ka nung ashi.

Iba digital platform ya taxis, two-wheeler taxis aser auto-rickshaws nung senzürtem asoshi yangluogo. Iba application ajanga passenger

temi sorkari latetja aliba fares reprangtsü akok.

State sorkari public services tajungba akümtsü asoshi technology amshitsü merangba nung MizoTaxi ya shilem ka lir.

Mezüngbo iba app ya Aizawl nung dang amshitsü aser lia aodang tangalena amshi tenzüksü akok ta sorkar ketdangsürtemi ashi.

Meghalaya nung linük 13 indang PRAGATI 2026 tembangogo



Shillong, May 31, 2026 (Agencies): Meghalaya nung Umroi Military Station nung May 30, 2026 nü linük 13 adenba Exercise PRAGATI 2026 takok ngua tembangogo.

Iba multinational military exercise nung ghonda 72 validation exercise ka agia tembang.

Iba exercise nung India, Bhutan, Cambodia, Indonesia, Laos, Malaysia, Maldives, Myanmar, Nepal, Philippines, Seychelles, Sri Lanka aser Vietnam nungi military personnel 400 tema adenshia

shilem agiogo. Iba exercise ya Partnership of Regional Armies for Growth and Transformation in the Indian Ocean Region (PRAGATI) omen kübok agi.

Linük 13 nungi Vice Chiefs 6 aser senior military officials 40 temai shilem agia closing ceremony agiogo. Iba sentong nung Dhiraj Seth-i bendangertem agizük aser defence cooperation aser military-to-military ties akangshitsü atema sendentem amen.

Exercise PRAGATI 2026 ya semi-mountainous aser jungle

terrain nung agi aser iba ya counter-terrorism operations nung temulung agüja liasü. Sepaitemi rock craft, ambush & counter-ambush drills, slithering, jungle lane shooting, room & bus intervention, IED detection aser casualty evacuation amala exercise agi.

Iba sentong nung shilem ka ama Indian Army-i FICCI aser Army Design Bureau den yaritepa defence equipment exhibition ka agi. Iba nung India indigenous defence technologies aser next-generation military systems sayua liasü.

India den arütsü ken o tajunglen nungi angatetteptsü: Nepal PM



Kathmandu, Monupii/May 31 (Agencies): Nepal Ato kilonser Balendra Shah-i March ita elections agiba sülen tang mezüngbuba Nepal Parliament nung Deobarnü jembidang, India den arütsü tsütsü mangatettep aliba tajunglen nungi jembishinüa angatetteptsü ta ashi.

Ozüng yanglurtem den jembidang, "India den arütsü ken o ya langpang nung mener jembishinüa tajunglen nungi angatetteptsü," ta ashi, anungji par sorkari Nepal south tsütsü kidanger den litsü-lika mangatettep ken o talangka nungi atsüdaka aliba yimjung len nungi angatetteptsü temulungtetba aliba sayur.

Nepal-i Lipulekh-Limpiyadhura region nung kibur akumba onük nung koshia jembidang, par sorkari iba ken o United Kingdom dangi abentsü aser mangatettep ya British India mapang adok, ta Shah-i ashi.

Nepal-i tangar linük den ken o tamajung angatetteptsü asoshi diplomacy, kati ka akumtsüboa aser tajunglen nungi jembishinüba nung maneni temulung agütsütsü, ta ato kilonseri ashi.

India aser Nepal tsüngta arütsü kilometer 1,751 shi lir aser sobaliba, rongsenketzüng aser nübürtem tsüngta tesendaktep tajung lir.

Ajisüaka kidanger linük ana

ya arütsü kar, talisa west len Kalapani-Limpiyadhura-Lipulekh region aser south len Susta mechi mapang talangka nungi mangatettep nung lir.

Arütsü mangatettep ya 1816 Treaty of Sugauli balala ratetba dak sendaka lir, koba Kingdom of Nepal aser British India tsüngta zülutepa liasü. Linük anaprongi mangatettep tesem nungya kibur akumer.

Kalapani sector mechi mangatettep ya 2020 küm tesashiba akum, kechiaser India-i Uttarakhand nung Dharchula nungi Lipulekh Pass tashi lenmang ka semzüik, koba Kailash Mansarovar pilgrimage atema amshir.

Iba sülen Nepal-i map ka yanglushir sayaba nung Kalapani, Lipulekh aser Limpiyadhura ya par litsü ama sayu aser mapang tatsüka lir constitutional amendment ka ajanga iba map ya agizük.

India-i item tesem ya India meyong ta nokdaker aser arütsü ken o mangatettep aliba ajunga tang aliba bilateral mechanisms aser jembishinüa angatetteptsü ta shijen ashir. Taoba mapanga linük ana ya arütsü ken o aiben jembia arua lir.

Israel nunger sepaitemi Beaufort Castle atsüngogo

Jerusalem, Monupii/May 31 (Agencies): Israel nunger sepaitemi southern Lebanon nung küm 900 tain Beaufort Castle atsüngogo, koba kanga tongtibang tesem ka lir, ta military-i Deobarnü ashi.

Iba tesem atsüngba ya Iran-i teyari agütsüba Hezbollah telok anema jenjang tongtibang ka agiba asütsü. Israel aser Hezbollah na hopta trok tejakdang ceasefire atema nangzükteper liaka maneni raratepa arudar.

April ita ceasefire benokba sülen Hezbollah teloki Honibarnü northern Israel tesashtiba makogo, aser iba ajanga school tem shibangtsüsa aküm aser tenokdangba balala agüja liasü.

Military-i ashiba agi, Beaufort Ridge aser Wadi al-Saluki tesem azüoktsü aser iba tesem nung Iran tetuyuba nung Hezbollah militia aser parnok indang infrastructure amenoka alibatem raksatsütsü nükjidong nung iba operation ya benoka inyakogo.

Operation mapang Israel nunger sepai ka tepsetogo, ta military-isa shisem.

Ken o dak sendakba nung Lebanon aser Hezbollah nati osang kecha agüja mali.

Iba medieval castle aser ridge azüokba ajanga Israel-i Lebanon nung jenjang tali

agiba sayur. Iran den ceasefire benoker rara anener liaka Israel aser Hezbollah military nabo maneni raratepa arudar.

U.S.-Israeli nati Iran amak tenzükba sülen Hezbollah puria Iran rara tenzükter tananübuba March 2 nungi Israel amak tenzükba liasü. Iba sülen Israel-i Iran-i teyari agütsüba telok ya linük north len arrtsü nungi mintoktsü atema jenjang agi tenzükba liasü.

Beaufort Castle aziükba ajanga Israel nunger sepaitem nem southern Lebanon aser northern Israel nung tesem tuluba ka ngujema akümstsü. Iba tesem nungyagi Israel nunger nübürtem aliba tesem maka aruogo.

Hezbollah puri iba tesem nungi Israel aiben makogo, ta military-i ashiba den Israel nunger sepaitemi iba tesem nung launch infrastructure tem raksatsütsü atema jenjang agi, kong nungi Israel nungertem aser IDF sepaitem dak projectiles noklang aika khaloktsüogo, ta shisem.

Maneni Israel nunger sepaitem Nabatieh anasa-a inyaksangshidar. Iba tesem ya southern Lebanon nung Hezbollah pur kanga tashi ita amenoka aliba tesem ka lir, ta military-i ashi.

South Korea, Japan na military-logistics support atema sensak asem

Singapore, Monupii/May 31 (Agencies): South Korea aser Japan na military-logistics support tenangzüktepba ka yanglutsü atema sensaksemogo, ta Deobarnü Seoul indang defense telokalbai metetdaksü.

Ajisüaka iba iba tenangzüktepba yanglutsü atema Seoul-i kanga kümdanga jenjang agidar, ta paisa shisem.

"Iba tenangzüktepba yanglutsü atema linük anapronglan nungi nübürtem nem angadaksütsüla aser parnok nem mulunga agizükdaksütsü nüngdaker. Ken o ya kanaga kümdanga inyaksangshitsüla ta amanger," ta Defence Minister

Ahn Gyu-back-i, Honibarnü Singapore nung defence ketdangsurtem senden amenba mapang Japan Defence Minister Shinjiro Koizumi den sensak asemba sülen osangbenertem dang ashi.

Ahn-i, acquisition aser cross-servicing tenangzüktepba dak sendakba nung jembirba liasü. Iba ajanga US den sendaktepa aliba kidanger linük ana nem ya totsü, chiyongtsü aser injang amala military logistics tem lemsateptsü aser alizüktsü asoshi temelaba agütsütsü

South Korea-i iba jenjang ya kanga kümdanga agidar, kechiyong 1910 nungi 1945

tashi Japan-i yimsüsüba mapang mepetmesü aika adokogo aser Japan nungertem Korean Peninsula nung inyaksangshitsü ya nübürtemi anemtsü akok.

Ken o asüngdangtsü atema Japan indang Ministry of Defense aser Ato Kilonser office den tongtepratepdang saka telangzüba kecha magütsü.

Kasa mapang nung Japan defense ministry-i ashiba agi, Koizumi aser Ahn na June ita joint humanitarian search aser rescue exercise ka agitsü atema sensaksemogo, koba küm teku tsüngda mezüngbuba asütsü.

Ukraine indang drone agi Russia nung tesem balala amak

Moscow, Monupii/May 31 (Agencies): Ukraine indang drones agi Russia nunger regions balala nung energy aser industrial targets amak ta Russian ketdangsur temi ashir, koba ki o jen anema amakba tali akumba alitsü.

Volga River nung totzü atsüba tesem aika aliba Saratov, kong Ukraine-i mapang shia amaker, yangji Governor Roman Busargin-i Deobarnü Telegram nung ashiba agi, ammag agi sangwa kuma amakdang "civilian infrastructure" rakatsü.

Ukraine mitkaria yasü Saratov oil refinery amakba jangjatsüogo, saka Russia-i amokbanga aliba Zaporizhzhia nuclear power plant amak ta Russia-i tai tongloktsüba

magizük. Moscow northeast tsütsü Ukraine nungi kilometer 1,300 shi pilar Kirov region nunga drones agi Urzhumsky district nung facility ka nung kongshi, ta Governor Alexander Sokolov-i ashi. Ukraine army-ia iba tesem amakba jangjatsüogo aser ano parnoki region nung Lazarevo oil-pumping station nunga amak ta ashi.

Ukraine den arütsüa aliba Rostov, Voronezh aser Belgorod regions nunga governor temi amakba shiogo aser Belgorod nunga civilian asem yiru.

Ukraine indang Russia-i amokbanga aliba Crimean Peninsula nunga Moscow-i yariba Governor Sergei

Aksyonov-i ashiba agi, ketdangsurtem dang petrol ayokba nokdangdaksür.

Pai kechi kuli ajangar mashi, saka Ukraine-i ita aika Crimea anasa southwestern Russa nung totzü indang ki o jen makyonga arur.

Ano Ukraine nem Germany-i Iris-T air defence missile launcher tasen ka agütsüogo ta Ukraine Tir Volodymyr Zelenskyy-i Deobarnü ashi aser pai ano Kyiv tembar linüktem dang air defence ammunition tali meshir.

"Russia-i amakba nokdangtsüsa onoki air defence systems atema missiles tema nüngdaker," ta Zelenskyy-i Telegram nung ashi.

JANGJATSÜR
JAPU Longshir Tambo Kidong ajanga Yamai Jangjatsür.

Tir Yimyim adok anogo 30-05-2026
 Page-7 ("Sangdonger"), nung Mr. Watitemjen Jamiri ...
 Anepchang lushi nung aliba fishery pond Ana (2) aser Tzülu ka aser Metemra Lümong Molung Ajemer (Lingrijan) Dimapur telok nem bendanga agütsür ta zülua alibaji yamai jangjatsür.
 Tamalen adok Nagaland Post 5th Aug, 2024 "Declaration", adok nunga Tedi Mr. Lanukaba ajanga Mr. Watitemjen ya ozü kinunger masüa ta declaration agütsüogo, anungji Mr. Watitemjen ya Aor sobaliba nung aliba ama pa ya kimong lumong aser tanga rongsen kecha nunga senmang mali ta jangjatsür.
 Anungji tanüa aser asünga iba kimong lumong nung shinga teka aitsü makok ta ozü kidongi nenshia metetdaksür.

Okümer
 (President)

Temjennungsang
 (Secretary)

GOVERNMENT OF INDIA
 MINISTRY OF CULTURE

INVITING APPLICATIONS FOR GRANT-IN-AID UNDER THE SCHEME OF "FINANCIAL ASSISTANCE TO CULTURAL ORGANIZATIONS WITH NATIONAL PRESENCE" FOR THE FINANCIAL YEAR 2026-27.

The Ministry of Culture, Government of India invites applications/proposals from Cultural Organizations under aforementioned scheme with the objective to provide financial assistance to Cultural Organizations having National Presence to meet the expenditure to be incurred on conducting the cultural programmes/festivals, etc. Details of scheme guidelines, eligibility criteria, prescribed application format, details of required documents, etc. are available on the website of Ministry of Culture i.e. <https://culture.gov.in/offering/schemes-services/financial-assistance-cultural-organizations-national-presence>

Eligible applicant organizations should submit two copies of applications, complete in all respect latest by 15th July, 2026 (5.00 PM) at the following address:-

Director, Eastern Zonal Cultural Centre
 IB-201, Sector 3, Salt Lake City
 Bidhannagar, Kolkata-700106, West Bengal

Incomplete applications and applications received after last date of receipt of applications WILL BE SUMMARILY REJECTED.
 Canvassing by the applicant organizations in any form will lead to disqualification of proposal.

PSG-i Arsenal koka küm anabuba atonga UCL kokogo



Monupii/May 31, 2026 (Agencies): Honibarnü Budapest nung UEFA Champions League final PSG aser Arsenal na asaya nung penalty metsütepba sülen PSG-i goal 4-3 agi takok ngua iba asayamung küm anabuba atonga benogo.

Asayamung mezüngbuba goal ya Arsenal nungi asayar Kai Havertz-i minute pongu tsüngda idaktsü, saka asaya tanabuba shilem nung Ousmane Dembele-i penalty ka ajanga iba goal küptok aser penalty metsütepba mapang Arsenal nungi asayar Eberechi Eze aser Gabriel nati goal midaktsütetba sülen PSG-i asaya koka liasü.

Iba asaya akokba sülen PSG-i UCL title tanabuba benogo, saka Arsenal puri tang

tashi iba asayamung khen danga mekochteti lir. Küm 22 sülen Mikel Arteta lenisü Arsenal puri Premier League kokogo, saka tia maka UCL bo tera agi dang mekochteti season tembangogo.

Havertz, shibai küm pongu tejakdang goal ka idakja Chelsea puri UCL akokba nung teyari agüja liasü, pai Honibarnü final asaya nunga minute pongu tsüngda ball kanga junga bener lua Sefanov adena ball metsüokja liasü.

Asaya ya PSG puri amokbanger asaya aser asaya tanabuba shilem nung goal idaktsütsü atema kanga merangadanga asayaba mapang Arsenal nungi asayar Mosquera-i box telung nung Mosquera alangdaktsüba sülen referee-i PSG nem penalty

metsütsü maongka agütsü, koba Ousmane Dembele-i aibelen mesüi idakja liasü.

Atakzüksü aliba asaya mapang minute 90 aser minute 30 apuloktsür asayaba mapang telok anapronglai goal kaka dang idaktsütetba sülen penalty metsüteptsüsa aküm.

Penalty metsütepba mapang PSG atema Goncalo Ramos, Desire Doue, Achraf Hakimi aser Beraldo nungeri goal idaktsü, saka Nuno Mendes-i metsüba ball Raya-i nokdanga liasü.

Arsenal atema Viktor Gyokeres, Declan Rice aser Gabriel Martinelli nungeri goal idaktsü, saka Eze aser Gabriel nati ball metsütoka goal midaktsütetba ajanga parnoki asaya makok.

Satwik aser Chirag nati Singapore Open kokogo



Monupii/May 31, 2026 (Agencies): India nungeri tebur tarep asayar rongnungi temaba jenjang nung aliba tarep Satwiksairaj Rankireddy aser Chirag Shetty nati Deobarnü Singapore Open tebur tarep asaya final nung third seeds Fajar Alfian aser Muhammad Shohibul Fikri na kokogo.

Final asaya game asem tashi kanga toktepa asayaba sülen

Reddy aser Shetty nati iba asaya ya 18-21, 21-17, 21-16 agi koka taküm mezüngbuba asayamung kokogo.

Satwik aser Chirag nati tatemsa 2024 küm Thailand Open koker liasü. Iba asayamung akokba densema tenati tang ashi nung BWF World Tour title tekububa kokogo.

Indonesia nungeri tarep ya akokba sülen world No. 4 India

nungeri tarep ya Singapore Open akokba India nungeri mezüngbuba tarep kümogo.

2024 küm Thailand Open akokba sülen Satwik-Chirag na asayamung pezü tashi nung final tonga asayaogo, saka takok monguteti tanabuba jenjang nung dang tembanga aruba sülen tang Singapore nung iba asayamung ya kokogo.

Iba asaya masaya tsüngda Satwik aser Chirag na Indonesia nungeri tarep den ya asemen asayar liasü aser asaya ka akokba den ana mekoki liasü. Tarep ana ya tatemsa January ita Malaysia Open quarterfinals nung asaya liasü.

Iba asayamung nung India nungeri asayartem aika asaya saka tenati dang final tongteta takok nguogo. Tetsür kija asaya nung Sindhu aser tebur kija asaya nung Sen-a talanga asaya metuteti tsükatok.

Ajisüaka tarep temeyoktep asaya nung Dhruv Kapila aser Tanisha Crasto na semifinal tonga asaya saka tenati game asem tashi kanga toktep asayar Japan nungeri tarep Yuichi Shimogami aser Sayaka Hobara na 16-21, 21-17, 13-21 agi mekoki tsükatok.

Royal Challengers Bengaluru-i 2026 IPL kokogo

Monupii/May 31, 2026 (Agencies): Deobarnü Narendra Modi Stadium, Ahmedabad, Gujarat nung Royal Challengers Bengaluru aser Gujarat Titans na Indian Premier League final asaya RCB-i wicket pongu agi kokogo.

Final nung takok anguba sülen Royal Challengers Bengaluru-i küm anabuba atonga Indian Premier League kokogo.

Asaya nung RCB atema Virat Kohli-i kanga junga asaya-a team takok dangi aniba dang masü saka pai ball 25 nung half century yanglua pa indang career nung half century takaratiba yangluogo.

Mezüng batting amenba sülen Gujarat Titans puri over 20 nung asayar 8 out ser run 155 dang yanglua liasü.

RCB bowler temi tetenzük nungi ball kanga junga asayartem anisüngzüka masayadaktsü mapang shia out süja liasü. Parnok rongnungi Rasikh Salam-i run 27 agütsür wicket 3 agi aser Josh Hazlewood aser Bhuvneshwar

Kumar nati wicket anana agia liasü.

Gujarat pur batter temi junga masayateti mapang shia out asüba mapang ka nung Washington Sundar-i out mesüi ball 37 nung run 50 yangluba ajanga parnok jenjang tera tajungba kümdakja liasü.

Asaya tanabuba shilem nung RCB nungeri opener Kohli aser Venkatesh Iyer na senteper kanga kar run 62 yanglua par team jenjang kanga junga kümdaktsü, saka Iyer out asüba sülen parnoki run 29 dang yanglur wicket pezü tashi out süatok.

Asayartem kanga kara out süatokba mapang ka nung taoba mapang RCB captain Kohli-i süngiemshir asaya, aser pai out mesüi ball 42 nung run 75 yanglua par team takok dangi aniogo. Asaya akoktsü atema run ka dang nungdaka aliba mapang Kohli-i six ka züka asaya tembangdaktsü.

Asaya nung Gujarat Titans bowler tem rongnungi Rashid Khan-i wicket 2, Mohammed Siraj-i wicket 1 aser Kagiso Rabada-ia wicket ka agia liasü.

French Open: Kostyuk-i Swiatek tsükdaktsüogo

Monupii/May 31, 2026 (Agencies): French Open pezüben koker alila Iga Swiatek taküm iba asayamung nung Marta Kostyuk-i straight game nung kokogo.

Poland tsür third seed Swiatek-i asaya junga masayatet aser Ukraine tsür 15th seed Kostyuk-i iba asaya ya 7-5 6-1 agi koka lai taküm asaya 15 nung khen danga tamakok mongui asaya arudar.

Roland Garros pezüben akokba sülen Swiatek dang ya "Queen of Clay" ta ajar, saka lai 2024 küm Paris nung takok anguba sülen clay court nung asaya ka danga mekoki arudar.

Grand Slam trok koker alila, shiba June ita tatemlen la indang Wimbledon title defend asütsü lir, lai 2026 küm asayamung ka danga koka mali.

Kasa mapang nung Kostyuk bo 2026 küm clay court nung khen danga tamakok mongui French Open-i ai. Lai iba ita tetenzüklen Madrid Open akok aser April ita Rouen Open koka liasü.

Taküm French Open nung temaba jenjang nung aliba tebur aser tetsür asayartem asayamung nung kanga kara tsükatokertem rongung Swiatek-a densemogo.

Tebur world number one

asayar Jannik Sinner, Grand Slam 24 koker alisang Novak Djokovic aser taoba küm iba asayamung koker alila Coco Gauff nungeri ajak tsükatokogo.

Kasa asayamung nung 18th seed Romania tsür Sorana Cirstea tang agi tanabenbuba French Open quarter-final-i iogo. Küm 17 sülen la taküm Roland Garros nung quarter tongtetogo.

Arishi küm 36 tain asayar shiba taküm küm tatem nung asaya nungi anisüngzüksü tebilemba lir, lai China tsür qualifier Wang Xiyu 6-3 7-6 (7-4) agi koka liasü.

Tetsür kija asaya nung Honibarnü tasembuba round nung Anastasia Potapova-i Coco Gauff 4-6, 7-6 (1), 6-4 agi tsükdaktsüogo.

Gauff-i taoba küm iba asayamung final nung top-ranked Aryna Sabalenka koka liasüm ajisüaka la takümba kanga kara tsükatokogo.

Maneni tetsür kija asaya nungsa Naomi Osaka-i arishi küm 18 tain America tsür Iva Jovic 7-6 (5), 6-7 (3), 6-4 agi kokogo aser la taruba asaya temaba jenjang nung aliba asayar Aryna Sabalenka den asayatsü.

Sabalenka-i 6-0, 7-5 agi Daria Kasatkina koka liasü.

BILEMDANGANG

"Tebang agi tenangzükba aika agütsüba dang nungibo mapa tila ka agi yariba tajungba."